

禮
部
志
稿

一九

卷一

卷二

卷三

卷四

卷五

欽定四庫全書

禮部志稿卷三十五

明 俞汝楫 編

主客司職掌

朝貢

國初諸番國及四夷土官朝貢具載職掌其後募化者衆事例日增土官衙門添設別見兵部而事關朝貢者附此

東南夷

見祖訓及職掌凡二十國祖訓例不征諸夷朝鮮
日本大小琉球安南真臘暹羅占城蘇門答刺西
洋瓜哇彭亨百花三佛齊淳泥凡十五國職掌所
載又有瑣里西洋瑣里覽邦淡巴須文達那諸國
與祖訓稍有不同

洪武初分遣使臣奉詔往諭諸番以平定四海之
意多隨使來朝貢者八年諭安南高麗占城等國

每三年一朝貢國王嗣立則世見永樂中數有事
於西洋遣中使以舟師三萬齎金帛諭賜之隨使
朝貢者十有六

朝鮮國

祖訓朝鮮國即高麗其李仁人及子李成桂今名旦
者自洪武六年至洪武二十八年首尾凡弒王氏四
王姑待之

按高麗併有扶輿新羅百濟其國分八道洪武二年國

王王顥遣使奉表賀即位請封貢物詔封為高麗國王
賜龜紐金印詔命五年以高麗貢使煩數諭令三歲或
歲一來二十五年李成桂代王氏請更其國號詔更號
朝鮮永樂初賜印誥自後每歲聖節正旦嘉靖十年外
夷朝正旦者俱改冬至皇太子千秋節皆遣使奉表朝
賀貢方物其餘慶慰謝恩無常期若朝廷有大事則遣
使頒詔於其國國王請封亦遣使行禮其歲時朝貢視
諸國最為恭慎嘉靖二十六年特許其使臣同書狀官

及從人二三名於郊壇及國子監遊觀禮部劄委通事
一員伴行撥館夫防護以示優異云 貢道由鴨綠江
歷遼陽廣寧入山海關達京師又中國漂流人口至本
國者量給衣糧送回 先是永樂元年其國王具奏世
系不係李仁人之後以辨明祖訓所載弑逆事詔許改
正正德嘉靖中屢以為請皆賜勅獎諭焉萬厯三年使
臣復申前請詔付史館編輯今錄於後李成桂系出本
國全州遠祖翰仕新羅為司空六代孫兢休入高麗十

三代孫安社生行里行里生椿椿生子春是為成桂之
父李仁人者京山府吏長庚裔也始王氏恭愍王顯無
子養寵臣辛旽子禍為子恭愍王為嬖臣洪倫等所弑
仁人當國誅倫等立禍禍嗣位十六年遣將入犯遼東
成桂為副將在遣中至鴨綠江與諸將合謀回兵禍懼
傳位於其子昌時恭愍妃安氏以國人黜昌立王氏孫
定昌君瑤誅禍逐仁人已而瑤妄殺戮國人不附共推
成桂署國事表聞高皇帝命為國王遂更名旦瞻瑤別

署終其身

貢物 金銀器皿 螺鈿梳函 白綿紬各色苧布

龍文簾蓆各色細花蓆 豹皮 獺皮 人參

黃毛筆 白綿紙 種馬每三年五十匹近有加貢

不在種馬之數

日本國

祖訓日本國雖朝實詐暗通奸臣胡惟庸謀為不軌
故絕之

按日本古倭奴國世以王為姓其國有五畿七道及屬國百餘時寇海上洪武五年始令浙江福建造海舟防倭七年其國王良懷遣僧朝貢以無表文却之其臣亦遣僧貢馬及茶布刀扇等物以其私貢却之又以頻年為寇令中書省移詰責自後屢却其貢并安置所遣僧於川陝番寺十四年從其請遣還十六年築登萊至浙並海五十九城二十年築福建並海十六城各置衛所永樂初復來朝貢賜龜紐金印誥命封為日本國王名

其國鎮山曰壽安鎮國之山御製碑文賜之給勘合百道始令十年一貢貢道繇浙江寧波府每貢正副使等毋過二百人若貢非期人船逾數夾帶刀鎗並以寇論宣德初遣貢不如約諭使臣自今貢毋過三船人毋過三百刀劒毋過三十嘉靖六年奏準凡貢非期及人過百船過三多挾兵器皆阻回二十九年定日本貢船每船水夫七十名三船共計水夫二百一十名正副使二員居坐六員土官五員從僧七員從商不過六十人三

十年後時入寇掠自是朝貢未有至者

貢物 馬 盔 鎧 劍 腰刀 鎗 塗金裝綵

屏風 灑金厨子 灑金文臺 灑金手箱 描金

粉匣 描金筆匣 抹金銅提鈔 灑金木鈔角盃

貼金扇 瑪瑙 水晶數珠 硫黃 蘇木 牛

皮

琉球國

祖訓大琉球國朝貢不時王子及陪臣之子皆入太

學讀書禮待甚厚小琉球國不通往來不曾朝貢

按琉球國有三王洪武初中山王察度山南王承察度
山北王怕尼芝皆遣使奉表箋貢馬及方物十六年各
賜鍍金銀印二十五年中山王遣子姪入國學以其國
往來朝貢賜閩人三十六姓善操舟者永樂以來國王
嗣立皆請命冊封後惟中山王至中山世稱尚氏諭定
二年一貢每船百人多不過百五十人貢道由福建閩

縣

貢物 馬 刀 金銀酒海 金銀粉匣 瑪瑙

象牙 螺殼 海巴 擢子扇 泥金扇 生紅銅

錫 生熟夏布 牛皮 降香 木香 速香

檀香 黃熟香 丁香 蘇木 烏木 胡椒 硫

黃 磨刀石 右象牙等物進收硫黃蘇木胡椒運

送南京該庫馬就于福建發缺馬羸站走遞磨刀石

發福建官庫收貯

安南國

祖訓安南國三年一貢

按安南國古交趾地洪武二年其國王陳日熿遣使朝貢請封詔封為安南國王賜鍍金銀印誥命未至而日熿卒以封其弟日焜後其臣陳叔明專黎季犛篡位俱降詔詰責季犛詭言陳氏無後請署國事已而日熿弟天平來訴季犛又詭迎天平還國伏兵殺之永樂四年發兵討平殄季犛父子郡縣其地尋有季擴之亂甫定而黎利復叛宣德間遣使謝罪請命因宥而封之嗣後

朝貢如常別有進中宮東宮方物其餘慶慰謝恩無常
期朝廷有大事則遣使頒詔於其國國王請封亦遣使
行禮嘉靖十九年其臣莫登庸篡立發兵討之明年登
庸降詔革王封止授都統使其所轄海陽等十三路各
改設安撫司每司設安撫一員同知一員聽自行陞黜
遇朝貢之年以陞黜過官員總數奏聞後登庸子莫福
海嗣朝貢不常萬厯四年都統使莫茂治遣使慶賀并
補貢二次九年復來貢亦補二次貢道由廣西憑祥州

貢物 金銀器皿 犀角 象牙 白絹 薰衣香
降真香 沈香 速香 木香 黑線香 紙扇

真臘國

真臘本扶南屬國其國濱海後并有扶南洪武四年其
國巴山王忽兒那遣使貢方物賀正旦六年復來貢貢
道由廣東後朝貢不常

貢物 象牙 犀角 孔雀翎 寶石 土降
香 蘇木 烏木 黃花木 胡椒 黃蠟